

Na osnovu čl. 4.2, 4.7. i 7. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", br. 7/02, 13/03, 76/09 i 1/11), člana 33. Poslovnika o radu Državne regulatorne komisije za električnu energiju ("Službeni glasnik BiH", broj 2/05) i čl. 16. i 26. Pravilnika o licencama – Prečišćeni tekst ("Službeni glasnik BiH", broj 63/16), rješavajući po zahtjevu "Nezavisnog operatora sistema u Bosni i Hercegovini" broj 05-28-12-17-1/19 od 10. januara 2019. godine, Državna regulatorna komisija za električnu energiju, na sjednici održanoj 27. juna 2019. godine, donijela je

ODLUKU O IZDAVANJU LICENCE ZA AKTIVNOSTI NEZAVISNOG OPERATORA SISTEMA

1. Izdaje se licenca "Nezavisnom operatoru sistema u Bosni i Hercegovini" Sarajevo za aktivnosti nezavisnog operatora sistema.
2. Licenca iz tačke 1. ove odluke izdaje se za period od 12. jula 2019. godine do 30. juna 2026. godine.
3. Sastavni dio ove odluke je Licenca za aktivnosti nezavisnog operatora sistema sa Uvjetima za korištenje licence za aktivnosti nezavisnog operatora sistema.
4. Vlasnik licence je u obavezi plaćati regulatornu naknadu u periodu važenja licence na način i u rokovima utvrđenim posebnim aktom.
5. Ova odluka stupa na snagu danom donošenja, a dispozitiv odluke bit će objavljen u "Službenom glasniku BiH", službenim glasilima entiteta i Brčko Distrikta Bosne i Hercegovine.

Obrazloženje

"Nezavisni operator sistema u Bosni i Hercegovini" Sarajevo (u daljnjem tekstu: podnosilac zahtjeva), neprofitna kompanija uspostavljena Zakonom o osnivanju Nezavisnog operatora sistema za prijenosni sistem u Bosni i Hercegovini ("Službeni glasnik BiH", broj 35/04 - u daljnjem tekstu: Zakon o osnivanju NOS-a) sa funkcijama i ovlaštenjima utvrđenim čl. 2. i 7. istog zakona i članom 5.2. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", br. 7/02, 13/03, 76/09 i 1/11 - u daljnjem tekstu: Zakon o prijenosu), korisnik je licence za aktivnosti nezavisnog operatora sistema, upisane u Registar licenci kod ove Komisije pod registracijskim brojem 05-28-12-30-21/12 od 3. jula 2012. godine, čije trajanje ističe 11. jula 2019. godine.

Shodno članu 48. Pravilnika o licencama - Prečišćeni tekst ("Službeni glasnik BiH", broj 63/16 - u daljnjem tekstu Pravilnik o licencama), ne kasnije od 120 dana prije isteka posjedujuće licence, vlasnik licence je u obavezi podnijeti zahtjev za izdavanje nove licence. U ovom smislu je to učinio podnošenjem zahtjeva zaprimljenim pod brojem 05-28-12-17-1/19 od 10. januara 2019. godine. O ovom zahtjevu odlučuje se u skladu sa članom 7. Zakona o prijenosu i internim pravilima i propisima DERK-a.

Zahtjev je podnjet blagovremeno, na propisanim obrascima, sa dokazom o prethodno izvršenoj uplati naknade za rješavanje zahtjeva i relevantnim dokumentima koji su, podnjeti uz zahtjev ili predočeni naknadno na zahtjev DERK-a, omogućili DERK-u da razumije, razmotri i odluči o podnijetom zahtjevu. U ovom smislu, u skladu sa članom 8. stav 2. Pravilnika o licencama, DERK je obavijestio podnosioca zahtjeva svojim aktom broj 05-28-12-17-5/19 od 14. marta 2019. godine o kompletnosti podnesenog zahtjeva.

Po pregledu i provjeri svih dokumenata u pogledu njihovih formalnih elemenata, DERK je pristupio razmatranju zahtjeva. Najprije je u skladu sa obavezom iz člana 10. Pravilnika o licencama, 18. marta 2019. godine objavio u dnevnim novinama i na svojoj internet stranici obavijest za javnost, sumirajući zahtjev za licencu i odredio rok do 26. marta 2019. godine za dostavljanje komentara javnosti na podnijeti zahtjev za izdavanje licence i dostavljanje zahtjeva za stjecanje statusa umješaa.

DERK konstatira da nisu dostavljani komentari u vezi podnijetog zahtjeva za dodjelu licence, niti je na javni poziv DERK-a bilo koje lice kandidiralo svoj interes da učestvuje u postupku u svojstvu umješaa.

Podnosilac zahtjeva nesporno ispunjava sve kriterije, uvjete i standarde propisane zakonom i pravilima i propisima DERK-a da obavlja aktivnosti nezavisnog operatora sistema. Njegove tehničke, pravne i finansijske mogućnosti permanentno su potvrđivane svih prethodnih godina u toku kojih je dokazivao da aktivnosti nezavisnog operatora sistema obavlja u skladu sa Zakonom o prijenosu i Zakonom o osnivanju NOS-a, pridržavajući se važećih međunarodnih dokumenata koje su prihvatila nadležna tijela BiH, primjenjujući Tržišna pravila i Mrežni kodeks, tehničke i komercijalne standarde, odnoseći se prema učesnicima na tržištu na fer i nediskriminirajući način i nevršeći manipulacije tržištem električne energije, primjenjujući u transakcijama propisane procedure, te uredno plaćajući regulatornu naknadu.

Nadzor svih aspekata usklađenosti dosadašnjeg djelovanja podnosioca zahtjeva sa uvjetima korištenja licence, pružio je dokaze DERK-u da može pristupiti pripremi početne verzije Uvjeta za korištenje nove licence za aktivnosti nezavisnog operatora sistema koja je od 22. maja 2019. godine učinjena dostupnom podnosiocu zahtjeva, kao i svim drugim zainteresiranim članovima javnosti, sa prilikom da svoje komentare iznesu i na općoj javnoj raspravi obavljenoj 30. maja 2019. godine u sjedištu DERK-a u Tuzli.

Podnosilac zahtjeva je iskoristio ovu priliku, te je putem ovlaštenog predstavnika na općoj javnoj raspravi zatražio pojašnjenja pojedinih odredbi nacрта Uvjeta za korištenje licence za aktivnosti nezavisnog operatora sistema. Osim traženja pojašnjenja određenih odredbi nacрта Uvjeta, podnosilac zahtjeva nije imao konkretnih primjedbi ili komentara na predložene dokumente.

Slijedom činjenice da podnosilac zahtjeva nije imao primjedbi na dokumente koji su bili predmetom opće javne rasprave, po njenom okončanju, a u skladu sa članom 16. Pravilnika o licencama, aktom DERK-a broj 05-28-12-17-16/19 od 5. juna 2019. godine, podnosiocu zahtjeva su dostavljeni prijedlozi Odluke o izdavanju licence i Uvjeta za korištenje licence koji se u osnovi ne razlikuju od prethodno razmatranih tekstova, kao i Izvještaj o provedenoj općoj raspravi, uz mogućnost da na dostavljene dokumente podnosilac zahtjeva iznese komentare u roku od osam dana.

U ostavljenom roku DERK-u su upućeni komentari podnosioca zahtjeva na pojedine odredbe Uvjeta za korištenje licence koji nisu isticani u prethodnom toku postupka. Bez obzira na činjenicu što se u konkretnom slučaju nije radilo o novom tekstu, u odnosu na tekst koji je prethodno bio predmetom opće javne rasprave i za koji je podnosilac zahtjeva već imao, ali propustio priliku davati komentare, DERK je dostavljene komentare pažljivo razmotrio, te u značajnoj mjeri i prihvatio u konačnoj verziji Uvjeta za korištenje licence za aktivnosti nezavisnog operatora sistema.

Respektirajući izričitost odredbe člana 2. Zakona o osnivanju NOS-a da nakon osnivanja NOS-a, nijedna druga elektroenergetska, niti bilo koja druga kompanija, ni organ neće imati nadležnosti ni ovlaštenje u djelatnostima koje su ovim zakonom povjerene NOS-u, i nakon što su pregledom statusa primjene svih komponenti koje su odlučujuće za dodjelu licence dobijeni uvjerljivi pokazatelji da podnosilac zahtjeva ima osigurane resurse, organizirane

uvjete i utvrđene profesionalne standarde da uspješno nastavi obavljati istu djelatnost, te na osnovu svega naprijed izloženog, odlučeno je kao u dispozitivu ove odluke.

Obaveza plaćanja regulatorne naknade proizilazi iz odredaba člana 4.10. Zakona o prijenosu kojima je regulirano da DERK uspostavlja regulatornu naknadu koju plaćaju vlasnici licenci, a koja se određuje tako da pokriva procijenjene troškove DERK-a.

U skladu sa članom 9.2 Zakona o prijenosu, regulatoru i operatoru sistema električne energije u Bosni i Hercegovini, protiv ove odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana prijema ove odluke.

Broj: 05-28-12-17-18/19

27. juna 2019. godine

Tuzla

Predsjedavajući Komisije

Milorad Tuševljak